

**Publication:** Berita Harian  
**Section:** Ekonomi  
**Date:** 28 October 2009  
**Page:** 22

# Bursa Malaysia perkenal indeks ESG

## Tanggungjawab alam sekitar, sosial, tadbir urus mampu pikat pelabur asing

Oleh Zainab Mohd Yatim  
 zmy@bharian.com.my

**B**URSA Malaysia akan memperkenalkan Indeks Alam Sekitar, Sosial dan Tabir Urus (ESG) yang bakal meningkatkan profil dan daya saing syarikat senaraian awam (PLC) tempatan di kalangan pelabur serta pelanggan produk dan perkhidmatan mereka.

Ketua Eksekutifnya, Datuk Yusli Mohamed Yusoff, berkata cadangan mewujudkan indeks ESG itu adalah sejajar dengan meningkatnya kesedaran pelabur serta pengguna terhadap keperluan tanggungjawab menjaga alam sekitar, tanggungjawab sosial dan

pematuhan pengurusan korporat.

"Kami bercadang mewujudkan indeks ESG dan berharap dapat melaksanakan dalam tempoh dua tahun. Bagi tujuan itu kami perlu bekerjasama dengan pelbagai pihak untuk menyediakannya," katanya kepada pemberita selepas menyampaikan ucapan pada perasmian Sidang Kemuncak CSR Asia 2009 bertemakan 'Penyelesaian Perniagaan bagi Cabaran Global', anjuran syarikat perunding, CSR Asia di Kuala Lumpur, semalam.

Turut hadir pada sidang kemuncak yang dihadiri 300 peserta yang mewakili sektor swasta awam dan

pertubuhan bukan kerajaan (NGO) itu ialah Pengerusi CSR Asia, Richard Welford.

Yusli berkata, indeks ESG akan menyenaraikan PLC yang mengamalkan pematuan persekitaran, kebajikan sosial dan tabir urus korporat terbaik untuk panduan pelabur.

Katanya, amalan ESG penting kepada PLC, khususnya syarikat yang terbabit dalam bidang perladangan dan makanan, seperti perladangan sawit yang ketika ini sering berdepan tekanan dan isu berkaitan persekitaran, perubahan cuaca dan tadbir urus.

"PLC perlu melihat amalan ESG secara serius, kerana ia akan menentukan kejayaan

perniagaan masing-masing dalam jangka panjang.

"Amalan itu juga akan memberi kesan kepada penerimaan pasaran terhadap produk dan perkhidmatan mereka, khususnya jika pasaran mereka adalah negara maju yang mempunyai pendedahan tinggi terhadap isu penjagaan alam sekitar," katanya.

Sementara itu, Welford berkata, Malaysia adalah sebuah negara yang tidak menggalakkan amalan CSR di kalangan pertubuhan dan syarikat milik awam dan swasta.

"Apa yang menariknya di Malaysia adalah kerajaan negara ini terbabit secara

langsung dalam menggalakkan CSR, dan agensi seperti Bursa Malaysia menyokong secara proaktif dengan memperkenalkan pelbagai inisiatif berkaitan bidang itu," katanya.

Beliau juga berpendapat, amalan ESG akan mengambillah pendekatan CSR secara perlahan-lahan, sejajar permintaan dan kesedaran pengguna yang semakin meningkat.

Katanya, amalan ESG tidak boleh diabaikan kerana ada kes yang mana syarikat dari Norway tidak mahu meneruskan pelaburan di Indonesia kerana tidak berpuas hati dengan amalan ESG di republik itu.



**“PLC perlu melihat amalan ESG secara serius”**

**Yusli Mohamed Yusoff**  
 Ketua Eksekutif  
 Bursa Malaysia